

Dispeûy one dîjin.ne d'anéyes, tos lès quinze djoûs, li djudi, dji va al sicole di walon Lucien Somme véci à Nameur, tot près do Pârlèmint.

Dji vou ètèrtinu èt mia causer nosse bia lingadje.

Vos l' savoz bin : « Po causer èt lire li walon, faut yèsse capâbe », don !

Tos lès-ans au mwès d' maîy, dji r'cî on diplôme come qwè dj'a bouté comufaut.

Mins l'anéye d'après, dji r'dobèle... I faut dire qu'on s'î plaît bin al sicole di walon.

Lès-èlèves sont pus rade dès soçons èt lès maïsses sont fwârt capâbes èt syincieûs.

Chake avou s' caractêre, i sont fwârt amichtauves. I-gn-a trwès-anéyes al sicole di walon. Li prumêre, c'est po-z-aprinde dès mots èt dès ratoûrnûres. Li deûzyinme, c'est po l'örtografîye èt lès conjugaïsons. Et li trwèzyinme po fé discouvru lès scrîjeûs walons èt nos-aprinde à scrîre. Chaque còp deûs-eûres au long. Vos vèyoz, on satche al bèsogne ! Et on n'a wêre di timps po fé toubac !

Cite anéye-ci, nos maïsses nos-ont lèyî ètinde qu'al rintréye do mwès d'octôbe, i-gn-aureut do novia.

Dès novias-èlèves, bin sûr !

Mins ossi one saquî d'impòrtant, on monsieu qui vòreut bin aprinde li walon. C'è-st-on' ome, parèt-i, qui s' dimande ci qu'i va div'nu s'i pièd s' place. Dès djins insi, i-gn-a brâmint au djoû d'audjoûrdu quand on veut tos lès comèladjes qu'i vos faut fé po-z-aarder vosse mèstî, surtout si c'è-st-one bèle place.

Cit-ome-là a minme atachî Pôl Magnette, li Présidint dèl Région walone èt il a scrît au mayer di Nameur po-z-awè on còp di spale. Come s'i faureut dès poûssants po v'nu al sicole di walon !

Dispeûy qui lès maïsses nos-ont dit çoula, dji tûze... Quî ç' sèreut ç' bin ? Dji su su dès tchôdès breûjes. Dj'a one pitite idéye. Wasereu dj' bin l' dire ?

Dj'aveu d'abòrd pinsé à Bart De Wever pace qui ç't-ome-là, s'i conireut one miète di walon, il aureut pus aujîy po fé bèbèle avou nos-ôtes po nos-èmacraler.

Ê là, mon parent, ni roviens nin qui, s'i t'as mougû do diâle, mi, dj'a ralètchî l' casserole ! Dji n' su nin sûr qui Magnette èt Prévot sèrin' fwârt binaujes.

Adon, on' ome qui fait sovint causer d' li po l' momint, c'est Eric Domb, li patron di Pairi Daïza. I pôreut insi aprinde li walon à sès pandas !

Mi, dji coneu bin l' grand maïsse dèl sicole di walon èt, à môde di rin, dj'a sayî d' sawè one saqwè.

Nin aujîy dè lî satchî lès viêrs foû do nez !

Dj'a tot l' minme pârvinu à-z-adviner li p'tit nom d' l'ome. Et i vèreut avou tote si famille. Ça fait chîs djins d'on còp. On l' lome Flupe.

Ça n' pout yèsse qui nosse riwè Philippe. C'est l' vraî qui, po l' momint, il èst mia vèyu pa lès Walons qui pa lès Flaminds. Si on djoû i-gn-a margaye èt qu'on còpe li pays è deûs, i vèreut avou nos. C'est sûr qu'i sèrè bin r'çû addé nos-ôtes avou tote si p'tite famille.

Nos saurans qwè al rintréye lu prumî djudi d'octôbe. Et dji vos l' vèrè dire. Vos vièroz bin si c'est dès mintes !

Vos èto, vos p'loz v'nu al sicole di walon. I n' faut nin lèyî tchamosser nosse bia lingadje.

Prononcé par **André Férard** à l'occasion du concours des menteurs de la Royale Moncrabeau le 27 août à Namur.